

(八) 一切衆生貪著世樂不慮無常。不以大患爲苦。譬如昔有一人遭事應死。繫在牢獄恐死而逃走。國法若有死囚踰獄走者。即放狂象令蹈殺。於是放狂象令逐此罪囚。囚見象欲至走入墟井中。下有一大毒龍張口向上。復四毒蛇在井四邊。有一草根此囚怖畏一心急捉此草根。復有兩白鼠嚙此草根。時井上有一大樹。樹中有蜜。一日之中有一滴蜜墮此人口中。其人得此一滴。但憶此蜜不復憶種種衆苦。便不復欲出此井。是故聖人借以爲喻。獄者三界囚衆生。狂象者無常。井衆生宅也。下毒龍者地獄也。四毒蛇者四大也。草根者人命根也。白鼠者日月也。日月尅食人命日日損減無有暫住。然衆生貪著世樂不思大患。是故行者當觀無常以離衆苦。